

## SAMÞYKKT

### um breytingu á samþykkt um stjórn og fundarsköp Grindavíkurbæjar, nr. 530/2022.

#### 1. gr.

Eftirfarandi breytingar verða á 48. gr. samþykktarinnar:

a. 4. tölul. B-liðar 48. gr. orðast svo:

*Félagsmálanefnd.* Fimm aðalmenn og jafnmargir til vara skv. 5. gr. laga um félagsþjónustu sveitarfélaga nr. 40/1991. Félagsmálanefnd fer með öldrunarmál skv. 7. gr. laga nr. 125/1999, jafnréttismál skv. lögum um jafna stöðu og jafnan rétt kynjanna nr. 150/2020, málefni fatlaðs fólks skv. lögum nr. 38/2018, húsnæðismál skv. 6. gr. laga um húsnæðismál nr. 44/1998 og yfirstjórn barnaverndarþjónustu skv. barnaverndarlögum nr. 80/2002, ásamt öðrum þeim verkefnum sem nefndinni eru falin með erindisbréfi.

b. Við C-lið 48. gr. samþykktarinnar bætist nýr töluliður, svohljóðandi:

8. *Umdæmisráð barnaverndar.* Grindavíkurbær stendur sameiginlega að umdæmisráði barnaverndar í samstarfi við önnur sveitarfélög samkvæmt samningi þar um, í samræmi við 14. gr. barnaverndarlaga nr. 80/2002, með síðari breytingum. Bæjarstjórn kýs einn fulltrúa sveitarfélagsins í valnefnd til fimm ára sem annast skipan umdæmisráðs skv. 2. gr. samningsins.

#### 2. gr.

Við samþykktina bætist nýr viðauki 2.1. um fullnaðarafgreiðslu mála hjá Barnaverndarþjónustu Grindavíkur samkvæmt 3. mgr. 12. gr. barnaverndarlaga nr. 80/2002 sem birtur er með samþykkt þessari.

#### 3. gr.

Samþykkt þessi sem bæjarstjórn Grindavíkur hefur sett samkvæmt ákvæðum 9. og 18. gr. sveitarstjórnarlaga nr. 138/2011, staðfestist hér með til að öðlast þegar gildi.

*Innviðaráðuneytinu, 2. mars 2023.*

F. h. r.

**Aðalsteinn Þorsteinsson.**

*Hafdís Gísladóttir.*

#### VIÐAUKI 2.1

### Um fullnaðarafgreiðslu mála hjá Barnaverndarþjónustu Grindavíkur, samkvæmt 3. mgr. 12. gr. barnaverndarlaga nr. 80/2002.

#### I. KAFLI

#### Grundvöllur.

##### 1. gr.

#### *Grundvöllur.*

Viðauki þessi er settur á grundvelli 3. mgr. 12. gr. barnaverndarlaga nr. 80/2002.

Tilgreindum starfsmönnum Barnaverndarþjónustu Grindavíkur er í samþykkt þessari falið umboð til könnunar, meðferðar og ákvarðanatöku í einstökum barnaverndarmálum og öðrum málum þar sem barnaverndarþjónustan fer lögum samkvæmt með ákvörðunarvald.

Sé ekki sérstaklega mælt fyrir um það í samþykkt þessari hver hefur heimild til að taka ákvörðun f.h. Barnaverndarþjónustu Grindavíkur hefur yfirfélagsráðgjafi eða sviðsstjóri félagsþjónustu- og fræðslusviðs heimild til að taka slíka ákvörðun.

## 2. gr.

*Skilgreining á hugtökum.*

1. *Sviðsstjóri* er sviðsstjóri félagsþjónustu- og fræðslusviðs Grindavíkurbæjar.
2. *Yfirfélagsráðgjafi* er stjórnandi Barnaverndarþjónustu Grindavíkur.
3. *Sérhæfður starfsmaður barnaverndarþjónustu* starfar á skrifstofu barnaverndarþjónustu, eftir atvikum í teymi og telst til sérhæfðs starfsfólks í skilningi 3. mgr. 11. gr. barnaverndarlaga. Þetta eru starfsmenn með eftirfarandi starfsheiti: félagsráðgjafi í barnavernd eða ráðgjafi í barnavernd.
4. *Starfsmaður* er starfsmaður Barnaverndarþjónustu Grindavíkur án sérhæfingar.
5. *Tilkynningafundur* er vikulegur fundur undir stjórn yfirfélagsráðgjafa, sem sitja auk hans sérhæfðir starfsmenn barnaverndarþjónustu og eftir atvikum sviðsstjóri þar sem teknar eru ákvarðanir um könnun máls og úthlutun tiltekinna mála til starfsmanna. Í fjarveru yfirfélagsráðgjafa getur sviðsstjóri eða tiltekinn sérhæfður starfsmaður barnaverndarþjónustu stýrt fundi fyrir hans hönd og tekið ákvarðanir í hans umboði.
6. *Meðferðarfundur* er fundur teymis, þar sem fram fara umræður um einstök mál, sjónarmið fagaðila, barna og foreldra eru ígrunduð og lagt mat á stefnu máls. Meðferðarfundir eru að jafnaði haldnir vikulega og stýrt af yfirfélagsráðgjafa. Í fjarveru yfirfélagsráðgjafa getur sviðsstjóri eða tiltekinn sérhæfður starfsmaður barnaverndarþjónustu stýrt fundi fyrir hans hönd og tekið ákvarðanir í hans umboði.

## 3. gr.

*Heimildir og umboð starfsmanna.*

Í forföllum eða fjarveru yfirfélagsráðgjafa leysir sviðsstjóri eða tiltekinn sérhæfður starfsmaður hann af. Gildir þetta um alla ákvarðanatöku sem fjallað er um í viðauka þessum.

## 4. gr.

*Starfslið.*

Sviðsstjóri og yfirfélagsráðgjafi ráða starfslið Barnaverndarþjónustu Grindavíkur.

Sviðsstjóra er heimilt að semja við stofnanir, svo sem á sviði félags-, skóla- og heilbrigðisþjónustu, um sameiginlegt starfsmannahald og sérfræðiþjónustu.

Sviðsstjóra og yfirfélagsráðgjafa er heimilt að fela utanaðkomandi sérfræðingum vinnslu og meðferð mála eftir því sem þörf er á hverju sinni. Þá er sviðsstjóra og yfirfélagsráðgjafa heimilt að semja við utanaðkomandi aðila um rekstur vistheimila eða annarra úrræða á grundvelli 84. gr. barnaverndarlaga.

## 5. gr.

*Valdsvið og samstarf barnaverndarþjónustu.*

Yfirfélagsráðgjafi getur samið við aðrar barnaverndarþjónustur um að mál skuli að einhverju eða öllu leyti unnið í þeirra umdæmi, þó barn hafi fasta búsetu í Grindavík. Sömuleiðis getur yfirfélagsráðgjafi samið við aðrar barnaverndarþjónustur um að mál skuli að einhverju eða öllu leyti unnið í umdæmi Barnaverndarþjónustu Grindavíkur þó barn hafi fasta búsetu annars staðar. Að öðru leyti fer um þessi mál samkvæmt 15. gr. barnaverndarlaga nr. 80/2002, með síðari breytingum.

Ef beita þarf neyðarráðstöfun skv. 31. gr. barnaverndarlaga vegna barns sem statt er í Grindavík en hefur fasta búsetu annars staðar getur sérhæfður starfsmaður, í samráði við yfirfélagsráðgjafa eða sviðsstjóra án undangenginnar málsmeðferðar skv. VIII. kafla barnaverndarlaga, framkvæmt hana. Starfsmaður skal án tafar tilkynna viðkomandi barnaverndarþjónustu um málið sem skal taka málið til meðferðar og taka allar frekari ákvarðanir.

## II. KAFLI

## Upphaf og könnun barnaverndarmáls.

## 6. gr.

*Nafnleynd.*

Tilkynnandi skv. 16. gr. barnaverndarlaga skal njóta nafnleyndar gagnvart öðrum en Barnaverndarþjónustu Grindavíkur, óski hann þess, nema sérstakar ástæður mæli gegn því. Óski aðili máls eftir afléttingu á nafnleynd skal yfirfélagsráðgjafi eða sviðsstjóri taka ákvörðun um afgreiðslu beiðninnar á fundi meðferðarteymis. Ef tekin er ákvörðun um að aflétta nafnleynd getur yfirfélagsráðgjafi í samráði við sviðsstjóra óskað lögreglurannsóknar á meintu broti gegn 96. gr. barnaverndarlaga.

## 7. gr.

*Ákvörðun um könnun máls.*

Þegar tilkynning berst skal hún afgreidd á vikulegum tilkynningafundi þar sem tekin er afstaða til þess hvort hefja skuli könnun máls. Ákvörðun um að hefja könnun máls skal ekki tekin nema rökstuddur grunur sé um að tilefni sé til.

Jafnframt er tekin afstaða til þess hvort tilefni sé til að taka ákvörðun um að fresta tilkynningu til foreldra um framkomna barnaverndartilkynningu vegna ríkra rannsóknarhagsmuna, sbr. 3. mgr. 21. gr. barnaverndarlaga.

Ef brýna nauðsyn ber til hefur sérhæfður starfsmaður, að höfðu samráði við yfirfélagsráðgjafa, heimild til að hefja könnun án þess að fjallað hafi verið um málið á tilkynningafundi.

Þegar tekin hefur verið ákvörðun um að hefja könnun máls úthlutar yfirfélagsráðgjafi málinu til sérhæfðs starfsmanns.

## 8. gr.

*Úthlutun annarra mála.*

Málum sem heyra undir Barnaverndarþjónustu Grindavíkur en eru ekki unnin á grundvelli V. kafla barnaverndarlaga skal yfirfélagsráðgjafi úthluta til sérhæfðs starfsmanns.

## 9. gr.

*Skipan talsmanns.*

Þegar tekin hefur verið ákvörðun um að hefja könnun máls skal sérhæfður starfsmaður að höfðu samráði við yfirfélagsráðgjafa taka afstöðu til þess í bókun á tilkynningafundi og/eða meðferðarfundi hvort þörf sé á að skipa barni talsmann.

## 10. gr.

*Könnun máls.*

Sérhæfður starfsmaður sem fer með könnun máls sér um að afla upplýsinga í samræmi við ákvæði barnaverndarlaga og reglugerða, leita aðstoðar sérfræðinga og óska eftir þjónustu Barnahúss eftir því sem við á, sbr. 22. gr. barnaverndarlaga. Hann leitast við að könnun fari fram í samráði og samvinnu við forsjáraðila, þó ætíð með hagsmunum barns að leiðarljósi. Sérhæfður starfsmaður fer með þær rannsóknarheimildir sem mælt er fyrir um í 43. gr. barnaverndarlaga. Sérhæfður starfsmaður tekur þátt í samþættingu þjónustunnar frá upphafi barnaverndarmáls ef fyrir liggur beiðni um samþættingu þjónustu í þágu farsældar barns sbr. 22. gr. a. barnaverndarlaga. Ef ekki liggur fyrir beiðni um samþættingu þjónustu ber sérhæfðum starfsmanni við upphaf könnunar og eftir þörfum á meðan könnun vindur fram, að leiðbeina foreldrum og/eða barni um rétt samkvæmt lögum um samþættingu þjónustu í þágu farsældar barna nr. 86/2021.

Að lokinni könnun máls skulu sérhæfður starfsmaður og yfirfélagsráðgjafi taka ákvörðun á fundi barnaverndarteymis um hvort loka eigi máli eða gera áætlun um meðferð máls, sbr. 1. mgr. 23. gr.

## 11. gr.

*Lögreglurannsókn.*

Ef grunur leikur á að alvarlegt refsivert brot hafi verið framið gagnvart barni tekur sérhæfður starfsmaður ákvörðun um að óska lögreglurannsóknar. Eftir atvikum skal leita samþykkis þess forsjár-

aðila sem hefur barn í sinni umsjá og hafa samráð við barnið. Yfirfélagsráðgjafi skal upplýstur um að máli hafi verið vísað í lögreglurannsókn.

12. gr.

*Neyðarráðstafanir.*

Ef beita þarf neyðarráðstöfun skv. 31. gr. barnaverndarlaga getur sérhæfður starfsmaður að höfðu samráði við yfirfélagsráðgjafa eða sviðsstjóra framkvæmt hana án undangenginnar málsmeðferðar skv. VIII. kafla barnaverndarlaga.

Með samþykki forsjáraðila getur sérhæfður starfsmaður tekið ákvörðun um neyðarráðstöfun gagnvart barni sem er 15 ára eða eldra án samráðs við það. Yfirfélagsráðgjafi skal upplýstur um ákvörðunina.

Við aðstæður þær sem 1. mgr. 31. gr. barnaverndarlaga lýsir er sérhæfðum starfsmanni heimilt, þrátt fyrir ákvæði 4. mgr. 43. gr., að fara inn á heimili enda sé ástæða til að ætla að barn sé í bráðri hættu.

### III. KAFLI

#### **Ráðstafanir barnaverndarþjónustu.**

13. gr.

*Áætlun um meðferð máls.*

Sérhæfður starfsmaður, í samvinnu við forsjáraðila og eftir atvikum barn sem náð hefur 15 ára aldri, skal gera skriflega áætlun um meðferð máls og undirritar áætlunina f.h. Barnaverndarþjónustu Grindavíkur.

Sérhæfður starfsmaður skal gera drög að einhliða áætlun um framvindu máls og beitingu úrræða, náist ekki samkomulag við foreldra eða barn, þegar það á við, sbr. 24. gr. reglugerðar nr. 56/2004 um málsmeðferð fyrir barnaverndarnefnd og 4. mgr. 23. gr. barnaverndarlaga. Drög þessi skulu lögð fram á meðferðarfundi til umfjöllunar og fullnaðarafgreiðslu af hálfu yfirfélagsráðgjafa eða sviðsstjóra.

Sérhæfður starfsmaður og yfirfélagsráðgjafi taka ákvörðun á meðferðarfundi um lokun máls þegar áætlun rennur út eða meðan meðferðaráætlun er í gangi ef aðstæður barns verða viðunandi eða ekki er af öðrum ástæðum þörf á áframhaldandi vinnslu á grundvelli barnaverndarlaga.

14. gr.

*Framkvæmd meðferðaráætlunar.*

Sérhæfður starfsmaður skal sjá um alla framkvæmd meðferðaráætlunar. Hann skal koma á þeim stuðningi sem þar er mælt fyrir um og þörf er á, þar á meðal samþættingu þjónustu í þágu farsældar barns. Hann skal meta þörf á samstarfi við aðra aðila sem veitt gætu stuðning eða vinna í málum barnsins og koma á slíku samstarfi sé þess þörf. Sérhæfður starfsmaður getur, með samþykki foreldra, beitt þeim úrræðum sem kveðið er á um í 24. og 26. gr. barnaverndarlaga, sbr. einnig 10. gr. reglugerðar nr. 652/2004 um úrræði á ábyrgð sveitarfélaga samkvæmt ákvæðum barnaverndarlaga.

15. gr.

*Úrræði utan heimilis með samþykki foreldra og barns.*

Sérhæfður starfsmaður og teymisstjóri geta, með samþykki foreldra og barns sem náð hefur 15 ára aldri mælt fyrir um að:

- Barnaverndarþjónusta Grindavíkur taki við forsjá eða umsjá barns og ráðstafað barni í fóstur,
- Barnaverndarþjónusta Grindavíkur taki við forsjá eða umsjá barns og visti barn utan heimilis á heimili eða stofnun eða leiti annarra úrræða skv. XIII. og XIV. kafla barnaverndarlaga til umönnunar, rannsóknar, meðferðar eða stuðnings.

Ákvörðun um að taka við forsjá eða umsjá barns, sbr. a- og b-lið skal tekin að undangengnu samráði á meðferðarfundi.

Sérhæfður starfsmaður með samþykki yfirfélagsráðgjafa getur ákveðið með samþykki ungmennis að ráðstöfun í fóstur eða vistun haldist eftir að ungmenni verður 18 ára, allt til 20 ára aldurs. Ákvörðun skal tekin af hálfu yfirfélagsráðgjafa eða sviðsstjóra að undangengnu samráði á meðferðarfundi.

Ungmenni getur skotið synjun, um að ráðstöfun í fóstur eða vistun haldist eftir að viðkomandi verður 18 ára, til úrskurðarnefndar velferðarmála.

## 16. gr.

*Vinnsla máls meðan vistun og fóstur varir.*

Þegar fyrir liggur ákvörðun um vistun eða fóstur barns skal sérhæfður starfsmaður fara með alla vinnslu máls á meðan vistun eða fóstur varir. Í því felst m.a. að sækja um vistun á meðferðarheimili á vegum Barna- og fjölskyldustofu, gera vistunarsamning á grundvelli 80. gr. barnaverndarlaga, sækja um vistun/fóstur á grundvelli 84. gr. barnaverndarlaga, ganga frá áætlun um trygga umsjá barns á grundvelli 25. gr. reglugerðar nr. 56/2004 og 33. gr. barnaverndarlaga, koma á stuðningi við barn og/eða vistunaraðila, hafa frumkvæði að umgengni við nákomna eftir því sem þörf er á og gera umgengnissamning, fylgja eftir áætlun um meðferð og vistun barns, meta tímanlega árangur af fóstri eða vistun áður en henni lýkur og þörf á beitingu frekari úrræða.

## 17. gr.

*Úrræði án samþykkis foreldra.*

Sérhæfður starfsmaður og yfirfélagsráðgjafi taka ákvörðun, að höfðu samráði við sviðsstjóra, um að óska eftir því við umdæmisráð barnaverndar að ráðið kveði upp úrskurð á grundvelli 26. - 29. gr. barnaverndarlaga. Ákvörðun skal tekin að undangengnu samráði á meðferðarfundi.

## 18. gr.

*Úrræði vegna ófæddra barna.*

Sérhæfður starfsmaður og yfirfélagsráðgjafi taka ákvörðun, að höfðu samráði við sviðsstjóra, um að sett skuli fram krafa fyrir dómi um sviptingu sjálfráðis barnshafandi einstaklings samkvæmt ákvæðum lögræðislaga, í samræmi við 2. mgr. 30. gr. barnaverndarlaga. Ákvörðun skal tekin að undangengnu samráði á meðferðarfundi.

## 19. gr.

*Endurskoðun ráðstafana.*

Sérhæfður starfsmaður og yfirfélagsráðgjafi að höfðu samráði við sviðsstjóra taka afstöðu til beiðni um endurskoðun ráðstafana í samræmi við 2. mgr. 34. gr. barnaverndarlaga. Ákvörðun skal tekin að undangengnu samráði á meðferðarfundi.

## 20. gr.

*Brottvikning heimilismanns og nálgunarbann.*

Sérhæfður starfsmaður og yfirfélagsráðgjafi taka ákvörðun um að setja fram beiðni til lögreglu í samræmi við 37. gr. barnaverndarlaga. Ákvörðun skal tekin að undangengnu samráði á fundi barnaverndarteymis.

## 21. gr.

*Fyrirsvar.*

Barnaverndarþjónustan fer með fyrirsvar fyrir dómstólum og úrskurðarnefnd velferðarmála. Sviðsstjóri að höfðu samráði við sérhæfðan starfsmann og yfirfélagsráðgjafa, tekur nauðsynlegar ákvarðanir um meðferð máls fyrir dómi.

## IV. KAFLI

**Ráðstöfun barna í fóstur.**

## 22. gr.

*Fóstur.*

Sérhæfður starfsmaður og yfirfélagsráðgjafi taka ákvörðun um að ráðstafa barni í fóstur í samræmi við XII. kafla barnaverndarlaga þegar fyrir liggja þær aðstæður sem mælt er fyrir um í 65. gr. barnaverndarlaga og 2. gr. reglugerðar nr. 804/2004 um fóstur. Sérhæfður starfsmaður og yfirfélagsráðgjafi, að höfðu samráði á meðferðarfundi, taka ákvörðun um þau atriði sem mæla skal fyrir um í

fóstursamningi, svo sem forsjárskyldur fósturforeldra, fósturtíma, greiðslur til fósturforeldra, umgengni í fóstri, stuðning við barn og fósturforeldra og annað sem máli skiptir.

## 23. gr.

*Beiðni um fósturheimili og val á fósturforeldrum.*

Sérhæfður starfsmaður sendir beiðni um fósturheimili til Barna- og fjölskyldustofu í samræmi við 2. mgr. 67. gr. barnaverndarlaga. Sérhæfður starfsmaður með samþykki yfirfélagsráðgjafa velur fósturforeldra úr hópi þeirra sem eru á skrá í samráði við Barna- og fjölskyldustofu, sbr. 16. gr. reglugerðar nr. 804/2004. Sérhæfður starfsmaður undirbýr barn undir viðskilnað við foreldra. Sérhæfður starfsmaður skal leita umsagnar forsjárlaus foreldris áður en barni er ráðstafað í fóstur.

## 24. gr.

*Réttarstaða foreldris sem ekki fer með forsjá barns.*

Ef aðeins annað kynforeldra fer með forsjá barns þegar úrskurður eða svipting á sér stað eða foreldri sem fer eitt með forsjá afsalar sér umsjá eða forsjá til Barnaverndarþjónustu Grindavíkur getur sérhæfður starfsmaður með samþykki yfirfélagsráðgjafa og að höfðu samráði á meðferðarfundi tekið ákvörðun um að ráðstafa barni til hins foreldrisins.

Með ákvörðun sérhæfðs starfsmanns og yfirfélagsráðgjafa, að undangengnu samráði á meðferðarfundi, er heimilt, ef hagsmunir barns eru taldir best tryggðir með þeim hætti, að afsala forsjá þess til hins kynforeldrisins.

## 25. gr.

*Réttarstaða foreldris sem barn býr ekki hjá þegar um sameiginlega forsjá er að ræða.*

Ef foreldri sem barn býr hjá þegar báðir fara sameiginlega með forsjá, afsalar sér umsjá barns skv. 25. gr. eða kveðinn er upp úrskurður um tímabundna vistun utan heimilis skv. 27. eða 28. gr. tekur sérhæfður starfsmaður með samþykki yfirfélagsráðgjafa ákvörðun um að hitt foreldrið taki við umsjá þess eða aðrir taki við umsjá þess. Ákvörðun skal tekin að undangengnu samráði á meðferðarfundi.

## 26. gr.

*Fóstursamningur.*

Þegar fóstur barns hefur verið samþykkt skal sérhæfður starfsmaður ganga frá fóstursamningi og undirrita f.h. Barnaverndarþjónustu Grindavíkur.

Ef breytingar verða á högum fósturforeldra á fósturtíma skal sérhæfður starfsmaður meta hvort þörf sé á að endurskoða fóstursamning í samræmi við 77. gr. barnaverndarlaga. Ef þörf er á endurskoðun fóstursamnings taka sérhæfður starfsmaður og yfirfélagsráðgjafi ákvörðun með bókun þar um, að undangengnu samráði á meðferðarfundi. Ef ekki næst samkomulag við fósturforeldra getur sérhæfður starfsmaður með samþykki yfirfélagsráðgjafa með rökstuddri ákvörðun breytt fóstursamningi eða fellt hann úr gildi.

## 27. gr.

*Greiðslur til fósturforeldra.*

Sérhæfður starfsmaður með samþykki yfirfélagsráðgjafa og að undangengnu samráði á meðferðarfundi tekur ákvörðun um fjárhæð fósturlauna í samræmi við 5. gr. reglugerðar nr. 858/2013 um greiðslur vegna barna í fóstri.

Fósturforeldrar geta óskað eftir endurskoðun á fjárhæð fósturlauna ef þeir telja að umönnunarþörf barns hafi breyst frá því að fóstursamningur var gerður.

Sérhæfður starfsmaður með samþykki yfirfélagsráðgjafa og að undangengnu samráði á meðferðarfundi tekur ákvörðun um greiðslur í styrktu fóstri með Barna- og fjölskyldustofu, í samræmi við 6. gr. reglugerðar nr. 858/2013.

Fari fósturforeldrar fram á greiðslur á ófyrirséðum kostnaði með rökstuddri beiðni í samræmi við 8. gr. reglugerðar nr. 858/2013 skal sérhæfður starfsmaður með samþykki yfirfélagsráðgjafa og að undangengnu samráði á meðferðarfundi taka afstöðu til beiðinnar með rökstuddri bókun.

## 28. gr.

*Slit föstursamnings.*

Sérhæfður starfsmaður með samþykki yfirfélagsráðgjafa og að undangengnu samráði á meðferðarfundum tekur ákvörðun um að breyta föstursamningi eða fella hann úr gildi, eins og mælt er fyrir um í 32. gr. reglugerðar nr. 804/2004. Ef ekki næst samkomulag við fösturforeldra þar um getur Barnaverndarþjónusta Grindavíkur með bókun meðferðarfundar breytt föstursamningi eða fellt hann úr gildi með rökstuddri ákvörðun.

## 29. gr.

*Framfærsluskýlda foreldra.*

Sérhæfður starfsmaður með samþykki yfirfélagsráðgjafa og að undangengnu samráði á meðferðarfundum tekur ákvörðun um hvort krafa verði gerð á foreldra um greiðslu framfærslueyris, sbr. 11. gr. reglugerðar nr. 858/2013 með hliðsjón af þörfum barnsins og fjárhagsstöðu og öðrum högum beggja foreldra. Með sömu sjónarmiðum getur sérhæfður starfsmaður með samþykki yfirfélagsráðgjafa og að undangengnu samráði á meðferðarfundum ákveðið að aðstoða foreldra við kostnað vegna umgengni við barn í fóstur að hluta eða öllu leyti. Ef ekki næst samkomulag skal afgreiða málið með rökstuddri ákvörðun.

## 30. gr.

*Umgengni í fóstur.*

Við ráðstöfun barns í fóstur skal sérhæfður starfsmaður hafa frumkvæði að því að gera tillögur um umgengni barns við kynforeldra og aðra nákomna þegar það á við. Leitast skal við að ná samkomulagi við þá sem umgengni eiga að rækja og ganga frá skriflegum samningi um fyrirkomulag umgengninnar, að undangenginni bókun meðferðarfundar.

Ef ekki næst samkomulag um umgengni getur sérhæfður starfsmaður með samþykki yfirfélagsráðgjafa og að höfðu samráði á meðferðarfundum gert tillögu um að umdæmisráð barnaverndar úrskurði um ágreiningsefni er varða umgengni barns við foreldra eða nákomna í samræmi við 81. og 74. gr. barnaverndarlaga.

## V. KAFLI

**Málsmeðferð barnaverndarmála.**

## 31. gr.

*Aðgangur að gögnum máls.*

Sviðsstjóri tekur ákvörðun, að höfðu samráði við sérhæfðan starfsmann og yfirfélagsráðgjafa, um að takmarka aðgang aðila að tilteknum gögnum máls í samræmi við 2. mgr. 45. gr. barnaverndarlaga.

## 32. gr.

*Aðstoð lögmanns.*

Bæjarstjórn samþykkir reglur um veitingu fjárstyrks til að greiða fyrir lögmannsaðstoð, sbr. 2. mgr. 47. gr. barnaverndarlaga.

Sviðsstjóri tekur ákvörðun um veitingu fjárstyrks á grundvelli 47. gr. barnaverndarlaga og í samræmi við reglur Barnaverndarþjónustu Grindavíkur um veitingu fjárstyrks.

## 33. gr.

*Kæruheimildir og endurupptaka mála.*

Aðilum máls er í samræmi við 6. gr. barnaverndarlaga heimilt að skjóta úrskurðum og stjórnvaldsákvörðunum barnaverndarþjónustu eftir því sem nánar er kveðið á um í barnaverndarlögum, til úrskurðarnefndar velferðarmála. Sérhæfðir starfsmenn barnaverndarþjónustu bera ábyrgð á að upplýsa aðila máls um kæruheimildir og kæruleiðir samhliða því þegar aðilar máls eru upplýstir um ákvarðanir barnaverndarþjónustu.

Beiðnum um endurupptöku ákvarðana Barnaverndarþjónustu Grindavíkur skal beint til sviðsstjóra og hafa aðrir aðilar í stjórnvísu sveitarfélagsins ekki heimild til að taka ákvarðanir um endurupptöku.

## VI. KAFLI

**Úrræði á ábyrgð sveitarfélagsins.**

34. gr.

*Sumardvöl fyrir börn.*

Sérhæfðir starfsmenn skulu sjá um móttöku, vinnslu og meðferð beiðna frá Gæða- og eftirlitsstofnun velferðarmála um umsagnir vegna umsækjenda um leyfi til að starfrækja sumardvöl í umdæmi Grindavíkurbæjar, sbr. IV. kafla reglugerðar nr. 652/2004. Þegar starfsmaður hefur skrifað greinargerð um málið að lokinni gagnaöflun skal hún kynnt umsækjanda og honum gefinn kostur á að koma að athugasemdum áður en umsögnin er send Gæða- og eftirlitsstofnun velferðarmála.

35. gr.

*Stuðningsfjölskyldur.*

Sérhæfðir starfsmenn skulu sjá um móttöku, vinnslu og meðferð beiðna frá Gæða- og eftirlitsstofnun velferðarmála um umsagnir vegna umsækjenda um leyfi til að gerast stuðningsfjölskylda sbr. 8. og 9. gr. laga um Gæða- og eftirlitsstofnun velferðarmála nr. 88/2021, 85. gr. barnaverndarlaga og VI. kafla reglugerðar nr. 652/2004. Þegar sérhæfður starfsmaður hefur skrifað greinargerð um málið að lokinni gagnaöflun skal hún kynnt umsækjanda og honum gefinn kostur á að koma að athugasemdum áður en umsögnin er send Gæða- og eftirlitsstofnun velferðarmála.

36. gr.

*Heimili og önnur úrræði á vegum Barnaverndarþjónustu Grindavíkur.*

Sérhæfður starfsmaður skal sjá um að gera samninga við vistunaraðila skv. 5. gr. reglugerðar nr. 652/2004, hafa samskipti við Barna- og fjölskyldustofu, Gæða- og eftirlitsstofnun velferðarmála og aðra aðila vegna þeirra úrræða sem fjallað er um í VII. kafla reglugerðar nr. 652/2004.

37. gr.

*Útvistun mála samkvæmt þessum kafla.*

Sviðsstjóri getur falið öðrum starfseiningum félagsþjónustu- og fræðslusviðs að sinna vinnslu verkefna skv. kafla þessum eða annað sem til þarf vegna úrræða á ábyrgð sveitarfélaga samkvæmt þessum kafla og reglugerð nr. 652/2004.

## VII. KAFLI

**Umsagnarmál.**

38. gr.

*Umsagnir samkvæmt ættleiðingarlögum nr. 130/1999.*

Sérhæfður starfsmaður annast könnun mála vegna umsagnar Barnaverndarþjónustu Grindavíkur um ættleiðingar skv. 16. gr. og 31. gr. laga um ættleiðingar nr. 130/1999. Umsagnir vegna ættleiðingarmála skulu lagðar fyrir meðferðarfund með skriflegri greinargerð þar sem m.a. koma fram upplýsingar um hagi og aðstæður umsækjanda og hvort umsækjandi uppfylli skilyrði í samræmi við ættleiðingarlög og reglugerð um ættleiðingar.